

Interessanta genealogia dalla schlatta Hendry



me. Cun la publicaziun d'in vast e bein illustrau cudisch davart la genealogia da famiglia han ils auturs Vic Hendry, Tarcisi Hendry e Beni Hendry fatg in schenghetg prezios als members dalla schlatteina Hendry che disponan ussa d'in manual custeivel davart historia e derivonza da lur famiglia.

Cun veseivel plascher ha Benedetg Hendry beneventau la gronda roschada da parentella ch'ei sereunida la sonda passada el hotel Alpina a Sedrun per festivar la presentaziun dil cudisch davart la historia dalla famiglia Hendry da provegnientscha tuatschina. Ordvarit satisfatgs eis el ch'igl ei reussiu da cumpilar ed edir in cudisch da quella dimensiun senza sustegn public grazia alla lavur cumina gratuita dils auturs e muort il sustegn moral e finanziel da members dall'atgna schlatta. Cun lur vuschs sereinas e sonoras ha in quartet dubel, formaus ord la parentella, delectau igl auditori, vid las preits pendevan ovras creadas cun maun inschignus e bien gust artistic da members dalla schlatta. Aschia vein nun observau cheu intarsias da Giusep Hendry, pictura purila da Justina Coray-Hendry, maletgs da Toni Monn ed entagls da Christian Hendry.

Sils fastitgs dils Hendrys

Vic Hendry, enconuschents sco sribent da vaglia, ha perscrutau igl uoppen da famiglia, fastisau origins e habitadis, denton era intercuretge urdadira e tenuta dils members da schlatteina e cavigliau sias impressiuns en interessants texts accumpignonts. La schlatta dils Hendrys ei stada mumnada per l'emprema gada els cudischs parochials da Tujetsch igl onn 1694. Sco ei seigi denton da supponer eri la schlatteina gia derasada el quitordischavel tschentaner en Tujetsch. Entochen viaden el 20avel, tschentaner ei la derasaziun dalla schlatta selimitada enteifer las scheinas dallas uclivas da Cavorgia e Surrein, e las casas braccas dettien, malgrad lur schampradad, perdetga d'in'ampia descendenza. E Vic Hendry cuschenta buca che ses antenats seigien stai bandischai plitost agl ur dalla val ed hagian stuiu tschercar lur dunnas pil pli tiels Guaisers secollocai en Tujetsch. Las colonias periferas da Maunsut erien plitost paupras ed hagian buca giu savens muis e cuida pils uffecis publics da vitg e val. Nuotatonmeins hagian ils Hendrys cun lur facilitad da secommunicar, cun lur amablidad e curtesia, denton era cun lur diligenza ed endinadad, empriu da sesvolver, stai stgis per enzatgei e setratgs atras in'andanta. Dils purs da Maunsut seigi sesviluppau ina classa luvrera ed ils biadis e sutbiadis hagian giu la cuida d'emprender in mistregn. In'entira partida hagi mess neu fatschenta ed in bi chischlet dils Hendrys seigien davantai mussaders e magisters. Las clamadas religiusas ein representadas cun pader Vigeli Berther (1911-1979), sora Blancarda Berther (1901-1973), sora Maria Ursula Berther (1907-1989), sora Sigisberta Hendry (1917), sora Carmelia Caduff (1919), sora Cecilia Monn (1925) e sora Letizia Hendry (1935).

Diligenza unida cun senn da responsablidad, acquistai sil strebel tschespet patern, hagian contribuui il lur al success da beinenqualin. Dil Plaun S. Leci anora seigi la famiglia sefatga considerablamein. In grond diember ei staus sfurzaus da bandunar la val. Quella tendenza ei aunc s'accentuada pli expressivamein ils davos onns. A Plaun S. Leci, il liug d'origin, che deva canorta per temps a 35-40 personas, habitescha oz aunc in soli sulet descendent dils Hendrys.

El 17avel tschentaner cattan ins la famiglia Hendry era a Breil, silsuenter eis ella morta ora. Pli numerusas ein las familias Hendry en Scozia, Engheltiara e lur descendents cattan ins oz en America ed Australia. Schebein els han denton ina relaziun directa culs Hendrys da Tujetsch ei buca stau da documentar.

Ina retscherca cunscienziusa

Cun archivar communal Tarcisi Hendry han ils Hendrys giu il cletg da haver in specialist da genealogias el ravugl dall'atgna feghialonza. Cun gronda acribia, exactadad e cunscienziusadad ha el rimnau e cumpilau la genealogia dils Hendrys sur buca meins che 5 generaziuns. Sortend dil num da Franciscus Hendry, naschius 1694 (pia avon 300 onns), ha Tarcisi Hendry erui l'entira descendenza

che dumbra oz buca meins che 300 personas. Cun ils dus, fegls da Jacob Andriu Hendry (1746-1805) entscheiva la sromaziun cun la lingua da Vigeli Giusep Hendry (1784-1866) e da Duri Vigeli Hendry (1796-1860). Fertun che la descendenza ei stada mudesta ils emprems decennis muort la gronda mortalitad infantila e muort ils biars celibataris, ei la feglialonga carschida e daventada ordvart numerusa el vegnavel tschentaner. La genealogia revelescha denton era ina maridaglia denter cusrins ed ina feglialonga da buca meins che 15 personas enteifer ina famiglia.

Il cudisch vegn enrihius entras las numerosas fotos da famiglia rimnadas da Benedetg Hendry. Il cudisch ei senza dubi in dun prezius che sclarescha ils origins e lubescha d'eruir ed intensivar ils ligioms da parentella sur il spazi da 300 onns. L'ovra ei vegnida stampada tier la Condrau SA a Mustér. Sco quei che il responsabel per las finanzas André Schmid menziunescha eis ei, malgrad l'ediziun limitada, reussiu da far in prezi favoreivel grazia alla lavur gratuita dils auturs ed alla generusadad dalla parentella.

La schlatteina Hendry. Ediziuns dils auturs 1994. Squetsch Stampa Romontscha Condrau SA, Mustér. Prezi: 72.– frs.

GR 25-10-1994

In interessant cudisch dalla schlatteina Hendry

Treis auturs da num e pum han perscrutau la genealogia dalla schlatteina Hendry e cumpilau in zun interessant e bellezza cudisch. Igl ei quei Vic Hendry, Tarcisi Hendry e Benedetg Hendry. Il squetsch ha la Stampa Romontscha, Condrau SA, Mustér procurau quei a moda magnifica.

En la preambel scriva Vic: «Enten ir suenter a tut quellas caussas maneclas dalla genealogia cun il num Hendry ein las marveglias ed il cudez vegni gronds». Pilver, quei che quels treis scrutaturs han rimnau davart la schlatteina Hendry fa surstar e sesmarvigliar. Igl ei fatgs e factums che dattan perdetga ch'ils Hendrys han purtau gronda cultura.

Tenor il cudisch retic da nums, edius da Konrad Huber, ei la schlatteina Hendry documentada dapi igl onn 1380, per exempel Jennin Hainrich, Tujetsch. Quella schlatteina cattan ins era a Breil, Siat e Trun. Interessant d'endriescher ei, ch'ins noda la schlatta Hendry era en Scozia ed ell'Engheltiara, nua ch'ils Hendrys han giu in impurtont plaid el capetel. Hendrys ein era emigrai ell'America ed ell'Australia. — Il num Hendry savess derivar da Haimrich (dudestg vegl) u da Heimrich (tudestg medieval) ni era da Heinrich ni Hagenrich che vul dir caucasa. Dil reminent ei Heinrich prenum e schlatteina.

Interessanta ei l'arma dils Hendrys. Sco H. Piepenstock, in heraldic, sa da dir, seigi igl uoppen dalla famiglia Hendry documentaus cun il num Andreas Hendry, Banneret 1619. Banneret significhescha «Bannerherr». L'arma ei biala. Ella presenta treis muotas. Sin la muota enamiez stat in pégn e sin las muotas dalla vart mintgamai in treifegl. Per mei ina attestaziun dallas grondas prestaziuns culturalas e scientificas dallas famiglias Hendry.

Dalla schlatta Hendry, derivan era pliras clamadas religiusas, magisters, scribents, poets ed artists. L'ovra ei cumparida cun caschun dils treitschien onns dapi la naschientscha da Franciscus Hendry (1694-1756). Tgi che ha interess da sfegliar en quei document vegli s'adressar ad in dils auturs. - Il cudisch davart la genealogia cun il num Hendry ei in scazi aparti. El cuntegn era bellezza fotografias dallas famiglias Hendry che regordan da temps passai e presents. Vegnius stampaus eis el en 300 exemplars. Igl ei ina lavur scientifica che ha basignau capientscha genealogica, historica e pazienza enorma. Als treis auturs auda in compliment sincer ed in engraziament sc'in tshiel stelliu.

Victor Durschei

GR 02-07-1996